

EFESO PUIBLUPI CRISTOWA TUKUSKAKUNATA SAN PABLO KARTA KACHASKAMANDA

¹ Nuka, Taita Dius munaskamanda, Jesucristo kachamuskami kani, Alli Willaita willaspa puringapa. Kamkuna Jesucristowa iuiarispá, Taita Diuspalla kaspá, Efeso puiblupi kaugsanakuskatami kai karta kachaikichita. ² Nukanchipa Taita Dius i Iaia Jesucristo, kamkunata kuiaspá, suma iuiaiwa kawapuachu.

Taita Dius, Cristowa iapa sumaglla kawaspa karamuskamanda

³ Nukanchipa Iaia Jesucristopa Taita Diusta nisunchi: “Kam, iapa suma atunmi kangí”. Paimi, Cristowa tukui ima suma luarpi iukaspá, nukanchita iapa sumaglla kawaspa, karamú. ⁴ Paillatatami, kai alpa manara tiagpita, Cristowa nukanchita agllarka; chasaka nukanchi, paimandalla kaugsaspá, paipa ñawipi ñi imapipas mana mapasina kangapa. ⁵ Ñugpamandata nukanchita kuiaspá agllarka, Jesucristowa paipa wambra-kuna niraiangapa. Chasami ñugpamandata munarka. ⁶ Paipa kuiaska wambra Jesucristomandami nukanchita iapa suma kuiarka. Chimandami Taita Diusta imaurapas ninchi: “Iapa suma atunmi kangí”.

⁷ Cristo wañuchii tukuspa, paipa iawarwami nukanchita randirka. Chiwanka, nukanchita iapa

suma kuiaspa, mana allilla ruraikunata pasinsiarka. ⁸ Chasa kuiaspami nukanchita karamurka, suma iuiái apispa, suma iachaita iukan-gapa. ⁹ Chasaka, pai ima munaska pipas mana iachaskatami nukanchita rigsichirka. “Chasami Cristowa rurasá” ñugpamandata niskatami kawachirka. ¹⁰ Pai chasa niskata rurái puchukangapa punchakuna chaiauraka, Cristota churangapami ka, tukui sug luarpi i kai alpa luarpi kagkunata suglla mandag kangapa.

¹¹ Nukanchi Cristowa tukuskakunamanda, Taita Dios ñugpamandata agllarka, pai ima iukaska nukanchipapas kangapa. Chasapasmí pai munarka. Pai imasa munaskasinami tukui allilla rurá. ¹² Chasa agllaska kaspami nukanchi ñugpa Cristota iuiagkuna iukanchi Taita Diusta: “Iapa suma atunmi kangí” nispa kaugsanakunga.

¹³ Kamkunapas, chi kispiringapa kaskamanda Alli Willaita uiaspa, Cristomanda sutipa willaskatami suma iuiarirkangichi. Chiura, Santu Ispirituwami siñalai tukurkangichi, paipa kagta niraiangapa. Santu Ispiritutami ñugpamandata chasa karamungapa niska karka.

¹⁴ Santu Ispirituwami nukanchi kasa iachanchi: paipa kagkunata diltudupa kispichiura, pai ima iukaskata chaskingapami kanchi; chasaka tukui-kunaka, Taita Diusta: “Iapa suma atunmi kangí” ningapa.

Taita Diospa suma iachai, Cristowa tukuskakunata karachu, mañaskamanda

¹⁵ Kamkuna Iaiá Jesuswa iuiarinakuskataka allillami iachani; chasallata, tukui paimandalla

sumaglla kaugsagkunata kuianakugtapas. ¹⁶ Chasamanda mana sakinichu, kamkunamanda Taita Diusta: “Pai Siñur” ningapa. ¹⁷ Nukanchipa Iaia Jesucristopa iapa suma atun Taita Diusta mañapuikichitami, paipa suma iachai kamkunata karapuachu; chiwanka, pai ima iuiachimuskata kamkuna iachagsamungapa; chasallata, pai kikinta mas allilla rigsingapa. ¹⁸ Paita mañapuikichitami, kamkunapa iuiaikunata punchaiachipuachu. Chiwanka, kasami iachankangichi: pai agllaskakuna suma luarpi ima chaskingapa suianakugta. Tukai ima chipi iapa suma iukaska, Taita Diuspalla kagkunamandami niraiá.

¹⁹ Kasapasmi iachankangichi: paipa iachaika, askurinti iapa atunmi ka. Chi iapa iachaiwami nukanchitapas paiwa suma iuiarigsamú. Chi iapa atun iachaillawantami, ²⁰ Cristo wañuskata kaugsachispa, suma luarpi paipa alli ladu tiarichigrirka. ²¹ Chipika, mandagkunamanda, atuniachiska kagkunamanda, awa wairapi iapa pudi mandagkunamanda, tukuikunamandapas mas awapi mandag kangapami tiarichigrirka. Kuna puncha ima tiaskakunata, paimi mandag ka. Kati samug punchakuna ima tiangapa kaskakunatapasmi chasallata mandag kangapa ka. ²² Taita Dios, tukuikunatami churarka Cristopa chaki ukuma kagsina, pai ima niskata rurangapa. Paitaka churarkami, uma kagsina, paiwa tukui tukuskakunapa iaia kangapa. ²³ Cristowa tukuskakuna niraianmi pai kikinpa kuirpu. Cristowa i paiwa tukuskakunawa, suglla kuirpusinami tukú, ñi ima manima pisi. Paimi ka tukui jundaipi

junda, ñi imapas mana pisi.

2

Taita Diospa suma kuiaimanda, nukanchi kispichii tukuskamanda

¹ Kamkunaka, ñugpata mana allilla ruraspa kaugsanakuspa, wañuskakunasinami niraiarkangichi. ² Kai alpapi tiaskakunallawa iuiaspa kaugsanakurkangichi, iaia kuku wairapi mandag munaskata ruraspalla. Chi iaia kuku, Taita Dios ima niskata mana uiagkunatami jiru rurangapa iuiachi. ³ Tukuikunami ñugpata chasallata kaugsanakurkanchi, imasa munaskasina jiru ruraspa. Nukanchipa aicha jiru munaikunata i sug rigcha sug rigcha iuiaikunata, chasakunata ruraspami kaugsanakurkanchi. Chasa kaugsanakugmandaka, Taita Dios, askurinti rabiariapa, sugkunasina nukanchitapas diltudupa ninama kachangapa karka. ⁴ Chasa kagpipas, Taita Dioska, nukanchimanda iapa llakispa kawaspami nukanchita suma kuiarka. ⁵ Chasaka, nukanchi kikin mana allilla ruraskakunamanda Diospa ñawipi wañuska kaspapas, kaugsachiskami niraianchi, Cristowa sugllapi kangapa. Taita Diospa suma kuiaimandami kispichii tukurkangichi. ⁶ Nukanchita kaugsachispaka, suma luarpi tiarichigsinami niraianchi, Jesucristowa sugllapi kangapa. ⁷ Chasaka, mana puchukaridiru punchakuna chaiaura, paika, iapa suma llakispa, nukanchita Jesucristowa askurinti iapa suma kuiagtami kawachingapa ka.

⁸ Taita Dios suma kuiagmandami, kamkuna, paiwa suma iuiaríspa, kispichiska tukurkangichi. Mana kispirirkangichichu kam kikinkunapa iuiaillawa. Taita Dios kikin karaskallawami kispichii tukurkangichi. ⁹ Kam kikinkuna allilla ruras-kamanda mana kispirirkangichichu; chasaka, ñi pipas mana atuniachiríspa ñingapa: “Nuka kikinllami kispirirkani”. ¹⁰ Taita Diosmi nukanchita chasa rurarka. Jesucristowami tiagsamurkanchi; chasaka, alli ruraikunata nukanchi ruraspa kaugsagsamungapa. Chi ruraikunaka, ñugpamandami nukanchimanda allichiska suiakurka, nukanchi chasa allilla ruraspa kaugsagsamungapa.

Cristo, tukuikunawa pasinsiachig kagmanda

¹¹ Chimanda kamkuna mana judíu kagkunaka, imasa ñugpata kaskata iuiariichi. Judiukuna kuirpupi marka churagkunaka, kamkunamanda ninkunami, mana marka churaska kagtakuna. ¹² Kamkuna, ñugpata mana Cristowami karkangichi. Israelmanda runakunawa manara sugllapi karkangichichu. Taita Dios ima karangapa niskatapas, kamkuna manara chaskingapa niraiarkangichichu. Ñi ima mana suiaspalla, mana Taita Dioswa iuiarispallami kai alpapi kaugsanakurkangichi. ¹³ Taita Diospagmanda karupi kaugsagsinami ñugpata karkangichi. Ikuti kunauraka, Jesucristowami Taita Diospagma kaillaiarkangichi. Cristo kruspi wañuska iawarmandami chasa kaillaiarkangichi.

¹⁴ Cristomi ka tukuikunawa pasinsiachig. Paimi judiukunawa mana judíu kagkunawa piñachirinakuskatapas pasinsiachigsamurka. Ima arka-

raiaskata anchuchigsinami rurarka; chiwanka, iskandikuna sugllasina tukungapa. ¹⁵ Pai kruspi wañuskawami Moisés tukui ima rurangapa niska kata lim puchukarka. Chasa ruraspaka, pai kikinwa judiukunata i mana judíu kagkunatapas sugllasinami musuiachigsamurka. Chiwanka, iskandima piñachirinakuskatami pasinsiachirka. ¹⁶ Pai kikin, kruspi wañuspami, iskandima piñachirinakuskata pasinsiachispa, suglla kuirpusina rurarka. Chasa iskandikuna pasinsiachii tukuspa, Taita Diuswapasmi sumaglla tukurkakuna.

¹⁷ Pai Cristo, samuspa, chi suma pasinsiaita tukuikunatami willagsamurka. Kamkuna Taita Diuspagma karupi kaskakunata, judiukuna mana karupi kaskakunatapasmi chasa willarka. ¹⁸ Judíu i mana judíu kaspapas, tukuikunami Cristowa pudinchi, suglla Santu Ispirituwa Taita Diuspagma kaillaianga. ¹⁹ Chimanda, kunaureka kamkuna mana sug karu alpamanda samuskasina kangichichu. Taita Diuspalla kagpurami tukuikuna kangichi. Taita Diuspa wambrakunapasmi kangichi. ²⁰ Kamkuna, sug atun wasisinami kangichi. Jesucristo kikin aglaska runakuna i Santu Ispirituwa rimagkunaka, chi wasi kallariska rumikunasinami kankuna. Paikunapa awalla saiachiskasinami kangichi. Kikin Jesucristoka, chi wasita charig rumi kagsinami niraiá. ²¹ Chasa paiwa sugllapi, chi intiru wasika, alli alli saiarispa, suglla suma wasisinami tukugsamú; chasaka, Iaia Jesuswa Taita Diuspalla kaska wasisina tukugsamungapa. ²² Kamkunapas chasallata Cristowa sugllasinami tukunakungichi. Chasaka,

Diuspa Ispíritu kaugsadiru wasisinami tukug-samunakungichi.

3

Mana judíu kagkunata Alli Willaita willaspa puringapa, San Pablo mingai tukuskamanda

¹ Chimandami nuka Pablo, Jesucristomanda Alli Willaita kamkuna mana judíu kagkunata willaskamanda kai karsilpi wichkaraiani. ² Ñami iachangichi: Taita Dius, nukatami mingawarka, paipa suma kuiaimanda willangapa; chasaka, kamkuna allillapi kangapa. ³ Mana pipas iachaskatami Taita Dius nukata iuiachiwarka. Chita ñami sug kartapi mailla willarkaikichita. ⁴ Chi kartata kawaspaka, pudingichimi, chi Cristomanda mana pipas iachaskata nuka iachagta iachagsamungapakuna. ⁵ Chi ñi maikan ñugpamandakunatapas mana iachachiskata, Taita Diusmi kunaura, paipa Ispirituwa, paipalla kag agllaska runakunata i Santu Ispirituwa rimagkunata willagsamurka. ⁶ Kasami kunaura willarka: tukui mana judiukunapas Alli Willaita uiagkunaka, suma luarpi tukui ima iukaska, kamkunapapasmi niraiá. Kamkunapas, Cristopa kuirpusinallatatami niraiangichi. Chasallata Jesucristowa, Taita Dius ima karangapa niskatami kamkunapas chaskigringapa kangichi.

⁷ Nukaka, chi Alli Willaita willangapami mingai tukurkani. Taita Dius, suma kuiawaspa, paipa iapa iachaiwami chasa mingawarka. ⁸ Nuka kanimi Cristowa tukui tukuskakunamandapas mas uchulla. Nuka chasa kagpipas, Taita Dius iapa

kuiawaspami mingawarka, mana judíu kagkuna-
 tapas Cristomanda willangapa. Cristo, nukanchi-
 manda niraiianmi suma luarpi iapa achka mana
 kuintangasina iukag kagta. ⁹ Kai alpa mana-
 ra tiaskauramandata, Taita Dius ima rurangapa
 niskata mana pipas iacharkachu; chitami kuna-
 ura nukata mingawarka, tukuikunata willanga-
 pa. Pai Taita Diusmi tukui rurag ka. ¹⁰ Chasami
 mingawarka, suma luarpi iapa pudig mandag-
 kunata kunaura tukui Cristowa tukuskakunawa
 kawachingapa: Taita Dius, imapipas iapa iacha-
 mi ka. ¹¹ Taita Dius, kai alpa manara tiaska-
 uramandata chasa kawachingapami niska karka.
 Nukanchipa Iaia Jesucristowami chasa tukui ru-
 rarka.

¹² Cristowa suma iuiarispami nukanchi pudin-
 chi, paiwa suglla tukuspa, Taita Diusta mana man-
 chaspalla rimangapa, imapas mañaspa. ¹³ Chasa-
 mandami mañaikichita: nuka kamkunamanda
 kai karsilpi iapa llakii pasakugpipas, kamkuna
 mana sambaiangichi. Kamkuna allilla kangapa-
 mi chasa pasakuni.

Cristo, nukanchita maituku kuiag kaskamanda

¹⁴ Chasamanda, Taita Diuspa ñawipimi kungu-
 rini, kamkunamanda mañangapa. ¹⁵ Pai Taita
 Dius kagmanda, sug luarpi i kai alpa luarpi tukui-
 kunaka paipa wambrakunami niraiianchi. ¹⁶ Taita
 Dius iapa suma achka iukagmandami paita maña-
 puikichita, paipa Santu Ispirituwa kamkunapa
 iuiaita paipa iapa iachai karamuchu. ¹⁷ Chi-
 wanka, kamkuna paiwa suma iuiarigmandami

Cristo kamkunapa iuiapi kaugsanga. Chasami kamkuna, Taita Diospa suma kuiapi angukunawa muruchuiaska sachasina kankangichi. ¹⁸ Chasawaka, kamkuna i tukui Cristowa tukuskunapas allillami pudinkangichi iachanga, Cristo nukanchita maituku kuiagta. Paipa kuiaika, ñi imapipas mana puchukarinchu. Ñi imawapas mana pudirinchu, paipa kuiaita tupungapa. ¹⁹ Ñi pipas mana iachanchichu, pai nukanchita maituku kuiagta. Kasapasmi Taita Diusta mañapuikichita: kamkuna, chi kuiaita iachaspa, Taita Diospalla tukuipi kangapakuna.

²⁰ Taita Dioska, nukanchi ima mañanakuska-manda mas achkami pudí karamunga, mana iuianakuskasina. Nukanchipa iuiapi kaugsakug iapa iachaiwami chasa karamungapa pudí. ²¹ Tukui Jesucristowa tukuskakuna Taita Diusta nisunchi: “Kam, imaurapas iapa suma atunmi kangi. Chasami diltudupa kamta ninakungapa kanchi, maituku waranga waranga watakuna ialigpipas. Chasa kachu”.

4

Santu Ispirituwa, suglla iuiaiwa kaugsanaku-sunchi

¹ Chasamanda nuka Pablo, Iaiia Jesusmanda kaipi wichkaraiaspa, kamkunata kasami mañai-kichita. Imasami Taita Dios, kamkunata kaiarka, imapipas allilla kangapa: chita uiaspa, Taita Diosmandalla sumaglla kaugsanakungichi. ² Imapipas tukuiwa sumaglla mana atuniachirispakangichi. Kam kikinpura kuianakuspa, sumaglla

llakinakuspa, mana piñachirinakuspalla kaug-sangichi. ³Taita Diospa pasinsiachiiwa kamkuna suglla niraiaspa, Santu Ispirituwa suglla iuiwaiwa kaugsanakungichi.

⁴Tukui Cristowa tukuskakuna, suglla kuirpumi niraianchi. Santu Ispiritupas, sugllami ka. Chasallata Taita Dios, tukui kamkunata suma luarmami kaiarka, suglla iuiwaiwa suianakungapa. ⁵Suglla Iai Mandagmi tia. Chaianmi, suglla iuiwaiwa Jesucristowa iuiaringapa. Baugtisaipas, sugllami tia. ⁶Suglla Taita Diosmi tia. Paimi tukuikunapa Taita niraiá. Paimi tukuikunata mandag ka; tukuikunawa rurá; tukuikunapi kaugsá.

⁷Chasa kaspapas, Taita Dioska, suma kuiaspa, Cristo imasa karamungapa iuiakuskasinami tukui nukanchita sug sug karamurka, tukuikuna allilla kangapa. ⁸Chimandami ñugpamanda librupi kasa willaraiá:

Tukui apii tukuska runakunata pusaspami awama sikarka.

Runakunataka karamurkami, tukuikuna allilla kangapa.

⁹Chi “awama sikaska”, ¿imatak niraiá? Niraiianmi, Cristo ñugpa kai alpa ukuma uraikugta. ¹⁰Uraikus-paka, Cristollatata tukui sug luarmanda mas awamami sikarka; chasaka pai kikin, tukui jundaipi junda mana ñi imapas pisi kangapa. ¹¹Awama sikaspaka, kikinmi karamurka:

sugkunaka, pai kikin kachaska runakuna tukungapa, Alli Willaita willaspa puringapa; sugkunaka, Santu Ispirituwa rimagkuna tukungapa; sugkunaka, Diospa Rimaita willaspa puringapa;

sugkunaka, Cristowa tukuskakunata iachachispa, suma kawagkuna kangapa.

¹² Chasaka, paipalla kagkunata allichirkami, pai-
 manda allilla ruraspa, Cristopa kuirpu niraiaska-
 kunata wiñachigsina tukungapa. ¹³ Chasawaka
 tukui nukanchi, Taita Diospa wambrawa sug-
 lla suma iuiaiwa kaspá, paita allillami rigsisun-
 chi. Chasapimi wiñachiskasina alli iuiaipí tuku-
 sunchi. Cristosinami tukusunchi, ñi imapipas
 mana pandarispalla. ¹⁴ Chiura, mana kasunchi-
 chu uchulla wambrakunasina, ima sug rigcha
 sug rigcha iachachiskata uiagkuna. Chasa llulla
 iachachigkuna, waira aliuspa apagsinami ruran-
 kuna, uianakuskata miski simiwa pandachinga-
 pa. ¹⁵ Chasapaka nukanchika, sutipa Alli Willaita
 kuiaiwa rimanakuspa, Iaiá Cristo uma niraiag-
 sinawa tukuipimi wiñanakunchi. ¹⁶ Imasami
 nukanchipa kuirpupi, maki, chaki, tukui kuirpu
 angukunawa suma wataskasina ka: chasallatami
 tukui Cristowa kagkuna, paiwa suglla kuirpusina
 kanchi. Chasa kaspaka, tukuikuna, sug sug imasa
 chaiaskasina parijuma allilla ruraspa, kuiaiwa
 allillapimi suglla kuirpusina wiñanakunchi.

Cristowa musuiachigsina iuiaikuna iukasunchi

¹⁷ Chasamanda, Iaiá Jesús imasa niskasina,
 kasami kamkunata mingaspa ninakuikichita.
 Mana mas kaugsaichi Taita Diusta mana
 rigsigkunasina. Paikunaka, mana Taita Dios
 tiagsinami kaugsanakú, mana allilla iuiarispalla.
¹⁸ Uma tuntiachiska iuiaiwami kaugsanakú.
 Paikunapa iuiái iana tutapisina tukuspami Taita
 Diusta mana rigsinkuna. Chiwanka, paipa

kaugsaita karamuskamanda anchuriskami kankuna. ¹⁹ Paikunapa alli iuiaikunata wañuchigsina ruraspa, kallarirkakunami, tukui jiru i mana allillakunata kusikuspa rurangapa. ²⁰ Kamkuna chasa kaugsangapaka, Cristo mana iachachirkachu. ²¹ Sutipami kamkuna, paimanda uiaspa, tukuipi sutipa Alli Willaita iachaikurkangichi. ²² Kasami kamkuna iachaikurkangichi: ñugpamanda mana alli kaugsaita sakingapa. Chasa kaugsagkuna, tukui jiru munai iuiaikunawa pandarispas, ismuskasinami niraiá. ²³ Chi mana allilla kaugsaita sakispaka, tukuipi suma iuiaita apiichi. Chasaka, musuiachiska iuiaikunami iukankangichi. ²⁴ Chi musu kaugsaita chaskiichi; chasaka, Taita Diussina alli tukungapa. Chi kaugsaita sutipa chaskiska kagkuna, Taita Diuspalla kaspas, imapipas allilla ruraspami kaugsankangichi.

²⁵ Chasaka, mana mas llullachingichi. Tukui-kuna, suglla kuirpusina niraiaspa, iukangichimi ñi ima mana llullaspalla sutipa kaskallata rimana-kunga.

²⁶ Rabiawa kaspapas, mana pandaringichi. Intiru puncha chisiagta mana rabiawa kangichi. ²⁷ Chasaka, mana sakirinkangichichu, iaia kuku kamkunata iuiachingapa.

²⁸ Maikan sisai kag, kunaauramanda mana mas sisangichi. Chasapaka, kam kikinkunapa makiwa trabajai kallaringichi. Chasa allilla trabajaspaka, pudingichimi, ministiskakunata mailla maillallapas karanga.

²⁹ Jiru rimaikunata mana rimangichi. Sumaglla imasa allilla chaiaskasina rimaikunata rimangichi. Chasaka, maikan uiaspaka, sumaglla iuiarispa, wiñachiskasinami kanga.

³⁰ Taita Diospa Santu Ispirituta mana llakingichi. Pai Ispirituwami siñalai tukungichi, imaura diltudupa kispichii puncha chaiamunkama. ³¹ Chimandaka, tukui mana alli iuiaikunata, piñaspa rabiariikunata, rabiariispa kapariikunata, mana alli kamispa rimaikunata, tukui mana alli ruraikunatapas sakiichi. ³² Kam kikipura tukui sumaglla alli aidachirinakuspa kaugsangichi. Imasami Taita Dios, Cristowa kamkunapa pandariikunata pasinsiarka: chasallatami kam kikipura iukangichi pasinsianakunga.

5

Taita Diospa wambrakuna, imasa kaugsai iukaskakunamanda

¹ Chimanda, Taita Diospa kuiaska wambrakuna kaspera, paisinallatata tukuipi sumaglla kaugsanakungichi. ² Imasami Cristo, nukanchita suma kuiarka: chasallata kam kikipurapas sumaglla kuianakuspa kaugsangichi. Pai kikinmi sakirirka, nukanchimanda wañuchii tukungapa. Imasami judiukuna Taita Diosmanda ubijata wañuchispa rupachiura, kusnisina suma asná: chasallatami Cristo wañuchii tukugmanda, Taita Diospa ñawipi sumaglla tukugsamurka.

³ Kamkunaka, ña Taita Diospallami kangichi. Chimandaka, kari warmiwa pandariskamanda, sug rigcha jiru pandariskakunamanda i sugkunapata munariskakunamanda kamkunapura

mana iacharichu. ⁴ Millai, jiru, upa parlukunatapas mana rimanakungichi. Chasa parlukuna, mana kamkunata chianchu rimangapa. Chasapaka, Taita Diusta: “Pai Siñur” nispallami iukangichi kaugsanakunga. ⁵ Kasami iachangichi: maikan kari warmiwa pandarig, sug rigcha jiru pandariikunapas rurag, sugkuna iukaskata munarig, Cristo i Taita Dios suma mandakuskapi mana pudingakunachu iaikugringapa. Chasa munarigkunaka, ianga diuskunata kungurigsinami rurankuna.

⁶ ¡Ujalallapas ianga rimaikunawa llullachispa, kamkunata pandachichukuna! Chasa jiru rurasakunamandaka, Taita Dios, pai ima niskata mana ruragkunawa askurintimi rabiariigsamungapa ka. ⁷ Chimanda kamkuna, mana paikunawa iuianakungichi, chasa jiru ruranakungapa.

⁸ Kamkuna, ñugpata iana tutapisinami kaugsanakurkangichi. Ikuti kunauraka, Iaia Jesuswa kaspaka, punchapi kaugsagsinami kangichi. Chimandami kamkunapas sugkunata punchaiachigisina kaugsai iukangichi. ⁹ Chasa kaugsagkunami, sugkunata tukuipi allilla sumaglla ruraspas, ñi imapipas mana llullaspalla kaugsankuna. ¹⁰ Iaia Jesús ima munakuskata iuiarispa, tukui allilla rurangichi.

¹¹ Iana tutapisina kaugsagkuna, Diospa ñawipi ñi imapa mana balimi rurankuna. Mana paikunawa sugllapisina jiru ruraspas kaugsanakungichi. Paikuna jiru ruranakuskamanda, piñaspa iuiachingichi. ¹² Paikuna ima pakalla ruranakuskamanda iachaspas rimagpika, pingaimi tukugsamungakunata. ¹³ Chi pakalla jiru rurana-

kuskamanda punchaiachig kawachiura, tukuimi iacharigsamungapa ka. ¹⁴ Cristo kikin punchaiachigsamuuraka, tukuimi punchaiachii tukungapa kankuna. Chimandami kasa niraiá:

Kam puñukug, rigcharii.

Wañuskasina kaspera, atarii.

Cristomi kamba iuiaikunata punchaiachigsamungapa ka.

¹⁵ Chimanda, allilla iuiariichi, imasami iukangichi kaugsanga. Upakunasina mana kaugsanakuichi. Chasapaka, tukuipi alli iachagsina kaugsanakungichi. ¹⁶ Kaugsankama iukangichimi, tukuipi allilla ruraspera chisianakunga. Nukanchita chaikumí, mana alli ruranakug kaskapi kaugsangapa.

¹⁷ Chimanda, upakunasina mana kangichi. Iaiá Jesús ima rurangapa munakuskata iachaikuspa, chita ruraspera kangichi.

¹⁸ Mana machangichi. Machaska purigkunaka, tukuipimi mana allilla rurankuna. Chasapaka Santu Ispíritu, kamkunapa iuiaipi jundagsamuchu. ¹⁹ Taita Diusta tukui sug rigcha sug rigcha suma kantukuna birsiaspa, kam kikinpura sumaglla iuiachirinakuspa kangichi. Tukui iuiawami iukangichi, Iaiá Jesusta kantaspera, “Iapa allimi kangi” nispa kangakuna. ²⁰ Imaurapas tukui-manda “Pai Siñur” Taita Diusta nispa kangichi, nukanchipa Iaiá Jesucristota iuiarispera.

Cristowa tukuskakuna, imasa sugkunawa kaugsanakui iukaskamanda

²¹ Cristota suma manchaspera, kam kikinpura parijuma sumaglla uianakuspa kaugsangichi.

²² Warmikunata niikichitami:

imasami Iaia Jesusta uiangichi: chasallata kamkunapa kusata sumaglla uiangichi. ²³ Imasami Cristo, uma kagsina, tukui paiwa tukuskakunapa iaia ka: chasallatami kamkunapa kusapas, warmipa iaia ka. Cristo kikinmi ka tukui paiwa tukuskakunata kispichig. Tukui paiwa tukuskakunaka, paipa kuirpumi niraianchi. ²⁴ Imasami Cristowa tukuskakuna, paita uianchi: chasallatami warmikunapas iukangichi, kamkunapa kusata imapipas uianga.

²⁵ Kusakunata niikichitami: imasami Cristo, tukui paiwa tukuskakunata kuiaspa, nukanchimanda wañurka: chasallata kusakunapas, kamkunapa warmita sumaglla kuiaspa kaugsangichi. ²⁶ Nukanchimanda Cristo wañurka; chasaka, Diuspa Rimaita uiaspa, iakuwa baugtisarispa, Taita Diusmandalla kaugsangapa; ²⁷ chasaka tukui Cristowa tukuskakuna, paipa ñawipi imapipas allilla sumaglla kawarigringapa, ñi imapipas mana mapasina kaspera, paipalla kangapa.

²⁸ Imasami kusakuna, kam kikinkunapa kuirputa kuidaringichi: chasallatami iukangichi, kamkunapa warmita sumaglla kuiaspa kanga. Maikanpas kikinpa warmita sumaglla kuiagpika, kikinllatata kuiagsinami niraiá. ²⁹ Ñi pipas pai kikinpa kuirpuwaka mana rabiarinchu. Chasapaka, mikui karaspa, sumaglla kuidaspami kuirputa charí. Chasallatami Cristo, tukui paiwa tukuskakunata sumaglla kwaspa charí. ³⁰ Cristowa tukuskakunaka, paipa kuirpumi niraianchi.

³¹ Kasami Taita Dius ñugpata nirka:

Chimandami kari,
 paipa taitata mamandita sakispa,
 paipa warmiwa iskandikuna
 sugllasina tukugsamungapa kankuna.

³² Chi rimaita, iapa atun kagmanda, ñi pipas mana iachagsamungapa kanchu. Chasa kagpipas, nuka kasami niikichita: Cristo i tukui paiwa tukuskakunawa suglla kagtami niraiá. ³³ Kasapasmi niraiá: tukui kusakuna, imasami kam kikinkuna kuiaspa kuidaringichi: chasallatami iukangichi, kamkunapa warmitapas kuianga. Warmikunaka, kamkunapa kusata sumaglla uiangichi.

6

¹ Wambrakunata niikichitami:

Iaia Jesusta kuiaspa, kamkunapa taita i mama tukui ima niskata allilla rurangichi. Chasa ruras-paka, allillami ka. ² “Kamba taitata mamandita sumaglla kuiangi”; chi ñugpa mandaiwami chasa uiagkunata, Taita Dios kasa karamungapa nirka: ³ Kam chasa kuiagpika, tukuipimi alli kankangi; kai alpapi unaimi kaugsankangi.

⁴ Taitakunata i mamakunata niikichitami: kamkunapa wambrakunata mana llakichingichi. Chasapaka, Iaia Jesupa kuiaiwa paikunata iuiachispa, suma asutispa wiñachingichi.

⁵ Lutrinkunata niikichitami: imasami Cristota manchaspa uiantrangichi: chasallata kamkunapa kai alpapi patrun niraiaskakuna tukui ima niskata allilla rurangichi. ⁶ Mana kawanakugmandalla allilla ruraspaka kangichi, “Sumami rurakungi niwachukuna” iuiaspalla. Imasami Cristo ima

niskata allilla rurangichichi: chasallatami iukangichi, kamkunapa patrun ima niskata tukui iuiaiwa allilla rurangakuna. Chasami Taita Dius muná. ⁷ Runakuna ima niskata ruragsinaka mana iuiangichi. Iaia Jesús ima niskata ruragsinami iukangichi, tukuipi imapas allilla rurangakuna. ⁸ Kasapasmi iachangichi: tukui lutrin u patrunkuna allilla ruragpikunaka, Iaia Jesuska imasa kadaunta chaiaskasinami karagsamungapa ka.

⁹ Patrunkunapas, chasallata kamba lutrinkunawa alli kangichi. Mana manchachingichi, “Asutingapami kaiki” nispa. Iuiariichi, paikunata i kamkunata mandag Taita Dius suma luarpi kagta. Paipa ñawipi, ñi pipas mana tianchu sug rigcha.

Taita Dius karamuska tukui katangasinata churarisunchi

¹⁰ Kunauraka, kasapasmi niikichita: Iaia Jesuswa i pai tukui rurag iachaiwami sinchi wapu iukangichi tukunga. ¹¹ Taita Dius karamuska tukui katangasinata churariichi; chasaka, iaia kukupa llullachiikunata kispiringapa. ¹² Aichaiug iawariug runakunawaka nukanchi mana makanakunchichu. Kai iana tutaiaskasina alpapi iapa pudi mandag i atuniachirispá kuku wairakunawa, awa wairapi iapa pudig kuku wairakunawami makanakugsina kanchi. ¹³ Chimanda, Taita Dius karamuska tukui katangasinata churariichi; chasaka, mana alli punchakuna chaiamuura, chi kukukunawa makanakuipi wapulla saiarispa mitikuchingapakunata.

14 Chasa paikunata mitikuchingapaka, sutipa Alli Willaita allilla chumbilliskasina kaichi. Alli ruraillawa kaugsaspaka, pichupi iru katanga churariskasinami tukungichi. 15 Chakipi churaraiaskasinaka niraianmi sumaglla kaugsaimanda Alli Willaita willai. 16 Imaurapas Cristowa suma iuiarispalla kaichi; chasaka, michadiruta makipi chaririskasina kangapa. Chasa iuiarispaka, iaia kuku tukui kachaska flichta sindisina millai iuiaikunata kispiringapami kangichi. 17 Cristo kamkunata diltudupa kispichingapa iuiaripa kaichi; chiwanka, michadiruta umapi churaraiaskasina kangapa. Santu Ispíritu karamuska makanasinaka niraianmi Diuspa Rimai. 18 Santu Ispíritu iuiachiska rimaikunawa imaurapas Taita Diusta mañangichi i ruangichi. Chasa rurangapaka, sumaglla iuiaiwa allichiriskasina kaichi, mana sambaiaspalla. Tukui Diuspalla kagkunamanda paita mañapuichi.

19 Nukamandapas chasallata Taita Diusta mañapuaichi, tukuipi nuka sumaglla rimangapa; chasaka, pitapas mana manchaspalla, Alli Willaita mana pipas iachaskata nuka willangapa. 20 Kikin Taita Diusmi nukata kachamuwarka, chi willaita tukuikunata willangapa. Chi willailatata nuka willaskamandami kunaura kaipi wataska wichkaraiani. Taita Diusta mañapuaichi, nuka rimangapa chaiaura, mana manchaspalla Alli Willaita willangapa.

Kaiakama, niskamanda

²¹ Nukanchipa kuiaska waugki Tíkiko, Iaia Jesusmanda tukuipi alli ruragmi ka. Paika, kamkunapagma chaiagrispa, nuka imasa kaskamanda tukui ima rurakuskatami willagringa. ²² Kasamandami paita kamkunapagma kachakuni: nukanchi kaipi imasa kaskamanda willagringapa. Chasaka, kamkuna mana sambaiankangichichu.

²³ Taita Dios i Iaia Jesucristoka, kam taita i mamakunata sumaglla kaugsaita karaspa, kuiaspa, iuiachipuachu, paiwa suma iuiarispanga. ²⁴ Mana tukurig kuiaiwa, nukanchipa Iaia Jesucristota tukui kuiagkunata, Taita Dios sumaglla kawapuachu.

Kaipimi Taita Dius Rimaku New Testament in Inga

copyright © 2009 Wycliffe Bible Translators, Inc.

Language: Inga

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Inga

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 11 Nov 2022 from source files
dated 29 Jan 2022
7cb53c42-7354-5f68-b71b-5115a92bd97a